

知不足齋所刻為武英殿本此本蓋  
心後宋本選錄者所出不同文句間  
有勝處本善順丁氏藏書也



國家圖書館 NATIONAL CENTRAL LIBRARY, TAIWAN, R.O.C.

朝野類要目錄

卷一

班朝共三十二條

故事共三十三條

文昌趙昇集錄

卷二

稱謂共四十一條

舉業共四十二條

醫卜共六條

卷三

入仕共四十四條

職任共十條

卷四

國家圖書館 NATIONAL CENTRAL LIBRARY, TAIWAN, R.O.C.



法令共七條

政事共四條

帥幕共十五條

文書共三十四條

雜制共九條

卷五

降免共十二條

憂難共九條

餘紀共十七條

朝野類要目錄



朝野類要卷一

班朝

御殿

本朝殿名最多如常朝則文德殿五日一次起居則  
 垂拱殿遇忌前假及祠祭日分則御後殿正旦冬至  
 及聖節稱賀大禮奏請致齋則皆大慶殿賀拜端聖  
 壽賜宴則紫宸殿宴對蕃使則長春殿試進士則崇  
 政殿若賜宴則集英殿郊祀稱賀則端誠殿諸般若  
 直推堞子則射殿之類又有內殿如萬歲復古邇英

文昌趙昇集錄



國家圖書館, NATIONAL CENTRAL LIBRARY, TAIWAN, R.O.C.



藥珠凝華福寧睿思殿今上皇帝建北宮後宮之類  
又不一也

### 朝儀

趨朝之儀如出入不由瑞禮門不端簡朝堂行私禮  
交互幕次語笑喧譁殿門內聚談行立失序立班交  
語相揖無故離位拜舞不如儀穿班伏出之類謂之  
失儀即閤門彈奏有責

### 常朝

今之所謂常朝蓋正殿也又名垂拱殿大凡殿門過

禮例合御某殿則臨期設牌常朝則自九月中旬至  
來年五月中旬

### 後殿

常朝值兩則改御後殿

### 六參

又名望參謂一五日之常禮也在京大小執事及不  
釐務官赴赴望參不得連三次請假

### 輪對

自侍從以下五日輪一負上殿謂之輪當面對則必

入時政或利便劄子若臺諫則謂之本職公事若三  
衙太師謂之執杖子奏事

內引

內殿引見則可亦少延時刻亦或賜坐亦或免穿執  
也

待漏

宮內之前待漏院所以俟候宮開門及閣子呼報排  
班則穿執而入也又名待班閣子

正謝

凡穿執命下待從之日即時赴新局當時便回却上  
辭免表奏之後朝命不允而已受方始正行朝謝

舞蹈

謂舞蹈有拜大起居

果見

有罪之人朝見如與免把見則仍舊穿執謂之果唯  
加武士簇擁

把見

軍頭引見司等子驅擁宥罪之人朝見也向來紹興

末年四川宣撫司管押到招提北界偽知魏州完顏  
守能知高州折可直常如此蓋唐以來朝見之儀有  
五此其一也今大禮赦及盛暑引竦決即亦用軍頭  
司擁見

### 典禮

郊祀大禮 京城之外大祭祀皆謂之郊祀如三歲  
南圓立時壯郊祀后土皇地祇明堂中謂之明堂大  
祀

### 五使

凡大典禮皆有之如郊祀明堂則有大禮使禮儀使  
儀仗使鹵簿使橋道頓遞使之類山陵亦有總護皆  
大臣師座為之

### 鼓吹

禮寺之太常樂也

### 警場

大禮等辨嚴也皆用上軍及衛仗司為之

### 宿衛使

駕出合經宿皆有宿衛使向來駕詣慈福宮等亦兩

六有之昔日新征則御營宿衛使

### 習儀

凡有大典禮習儀如郊祀大祀習五輅肆赦聖節習上壽儀及臨安府教樂之類

### 冊寶

奉上尊號冊寶亦有奉上冊寶使用太常儀仗鼓吹也凡玉冊則金寶所謂冊者條玉爲之紅線相聯可以卷舒字皆金填之或謂玉以碯石代之所謂寶者印章也並文思院供造

### 親饗

車駕朝饗太廟也其典祀 郊祀

### 朝獻

曰孟之月駕詣景靈宮也自神朝建如此在恤制內則權止

### 分獻

凡三歲大禮有大臣亞獻之外衆天神則在壇下分獻其餘神則差官往各處行禮

### 奏告



凡有典禮祈禱皆差官奏告天地宗廟社稷五嶽四海等處

致齋

行祀事之官預前于本局致齋謂不治事以謹潔其身也

受誓戒

三歲大禮干預行事官皆質明赴尚書省受誓戒然後致齋

恭謝

大典禮之後車駕詣景靈太乙兩宮行恭謝之禮  
分詣

四孟朝獻如值雨及有事故或第二日值雨皆命宰執分詣諸殿行事

幸學

車駕幸太學則有恩例蓋古養老尊賢之故事

釋奠

二月上丁日也凡學官并太常禮官即官皆赴太學大成殿全諸生行禮亦分爲初中終三奠用太學樂

八月同

降香

凡祈禱晴雨皆降御香乃內侍省掌其事羗快行齎送重則羗內侍供奉官

避殿損膳

昔時水旱祈禱未應并大變星象邊鄙未寧則聖上有避正殿減常膳之謙禮

輟朝

凡大臣薨皆有禮例特輟視朝三日或五日

故事

八寶

自秦得和氏之璧以為傳國玉璽其父曰受天明命既壽永昌後子嬰捧以降高祖于軹道者是也在漢則符璽令掌之增為六璽至晉惠帝北征亡失六璽石季龍得之遂改其父曰天命石氏迨唐亦有符寶即而五代唐末帝遭亂携以自焚故郭周重造八寶而以天下傳本朝謂受命之寶鎮國神太子之寶皇帝之寶天子行寶皇帝御寶天子信寶皇帝信寶且

各有所用如受命之寶惟封禪用之其他各朝增置寶不在此數

### 大朝會

本朝禮制有元日大朝會如古之諸侯述職也凡監司帥守悉赴正旦大宴鄉貢進士亦預焉諸道之進奏官乃唐之藩鎮質子留司京都豕發文字如今之機宜故謂之候邸

### 鎖院

凡言鎖院者機密之謂也故試士撰麻皆如此試則

所遣官預先入院議題有司撰辦撰麻則全番或半番快行節次往學士宅第傳宣俟傳宣快行來促學士上馬朝報修帽隨簇入院造勅頭尾則亦然若別有直宿

學士或直院則出避之當夜依宣撰述如不可行者

繳奏之謂之封還詞頭若可行則撰畢進呈閱報閣

門宣詞令舍人令同閣門宣詞且當晚御史臺閣門

報明日宣麻則文武百僚赴文德殿聽之如不可行

則又有執政不押麻之例即臺諫得以執奏除拜大

臣則上旬后妃中旬餘官下旬俗謂下旬剥麻非也

或偶置之耳

### 迎駕

車駕出幸經由在京去處凡百司局務官吏僧道在步之內並迎駕往回起居若免拜則祇奏聖躬萬福山呼若免起居則不排設祿亭香案也

### 駕頭

孔毅父談苑云駕頭者祖宗即位所坐也皇朝類苑曰謂之正衙法座香木為之加金飾四足隨其角其前小偃織藤帽為之駕卧則宣贊唱引迎駕居尸居

也人沈存中筆談謂是中貴官捧月樣杙子于馬上今係閣門宣贊舍人

### 躬請

車駕每春天或節序躬請北宮游幸回則從駕官多是戎裝而用御馬院勳樂今王上寶慶間躬請恭聖仁烈大后宮中宴賞是也戎裝謂免穿靴祇服衫帶若武臣則服色袍御馬院掌聖上所乘之馬也所謂驕騎院教駿營所掌者乃常朝并從駕者馬匹也如唐之五仗馬

### 教坊

自漢有胡樂琵琶箏篋後之中國推用戎尼之聲六

朝則又甚焉。唐時并屬太常掌之。明皇遂別置爲教坊。其女樂則梨園弟子也。自有教坊記所載。本朝增爲東西兩教坊。又別有化成殿鈞容班。中興以來。六有之。紹興末。臺臣王十朋上章省罷。之後有名伶達使皆留元德壽宮。使臣自餘多隸臨安府衙前樂。今雖有教坊之名。隸屬修內司。教學所然。過天宴等。每差衙前樂。權充之不足。則又私雇市人。近年衙前樂已無。教坊舊人多。是市井歧路之輩。歎責其知音。曉樂恐難必也。

### 等子

軍頭引見司等子。舊有諸州解發強勇之人。經由遞傳之京師。今則只取殿前舊司捧日等指揮人兵揀爲之。故今至等子。年勞授諸州排軍受事人員之職。出職之日。舊皆詣都進奏院行謝。蓋奏院轄地舖故也。等子之上。謂之忠佐。軍頭皆由百司人兵親兵及隨龍人年勞陞爲之。或募士代之。

### 金鷄

大禮畢。車駕登樓。有司于麗正門下肆赦。即立金鷄。

竿盤令兵士捨之在京係左右軍百戲人今乃瓦市  
百戲人爲之蓋天文有天鷄星明則主人間有赦恩

### 聞喜宴

在京則賜及第進士宴于瓊林苑中興以後統于貢  
院

### 曲宴

有旨內苑留臣下賜宴謂之曲宴與大宴不同之義  
也

### 聖節

國朝故事帝后生辰皆有聖節名後免之只名生辰  
惟帝節名蓋自唐明皇千秋節始也

### 進香

北宮聖節及生辰必前十日車駕詣殿進香

### 滿散

滿散者終徹也每遇聖節生辰宰朝赴明慶寺預先  
開啟祝壽道場至期滿散畢賜宴

### 曝書

每歲七月七日秘書省作曝書會係臨安府排辦一

應館閣并帶帖職官皆赴宴惟大禮年分及有事則免

聖祖

真宗皇帝尊九天司命尊為聖祖天尊大帝蓋仿唐尊老君故事也其詳載于國史又秘書有聖祖天尊大帝降臨記

諸節

自唐以二月一日為中和節國朝因之以正月三日為天慶節景德五年正月四日為開基節周顯德四年

日太祖皇帝登位 四月一日為禡節 大中祥符元年 四月六日為脫節 大中祥符二年 六月一日為先天節 後唐天成元年七月十一日聖祖軒轅皇帝降 十月二十四日為降聖節 大中祥符五年十月二日 是日禁屠宰行刑著為令甲 十四日天降書

天慶觀

諸州皆署建之所以奉聖祖天尊大帝

報恩光孝寺觀

高宗皇帝中興以來令諸州軍各置報恩光孝寺觀一所追崇佑陵香火

土貢

諸州歲貢土產之物也即夏禹任上作貢之義

宣賜

謂經由閤門有司出給關照之物為明宣賜不經由有司特旨賜之則曰暗宣賜

擊門

宰相動止謂陰有爆梨神衛之所以秦中歲時記言宰相儀有牛卧形者即是也今之宰執出入其金吾先以物敲擊門臺謂報警爆梨神也

免坐錢

國朝向有除授遙職郡某州刺史則亦有制命丁本州照應其州遇細銜公文則亦列其銜于後若本官他日經由本州則其知州合避廳遜坐本義刺史即是正官也舊有除節度使者經由本鎮不欲入坐而本鎮迎送之外又有禮物名免坐錢今廢之

收諸侯權

唐以來藩鎮有質子留京都而藝祖去襲封制知通資任以限之其餘制兵權之數則中興制度也



羈縻

荆廣州峽溪洞諸蠻及部落藩夷受本朝官而時有進貢者本朝志制為羈縻州蓋如漢唐制都護之類也如今之安南國王每遇大禮則加封功臣字號而每歲差官押曆日賜之是也

接送伴

藩使入朝差官待之來程有接伴使副回程為送伴館伴

藩使入國門則差館伴使副全在驛迨朝見辭游宴

伴射

殿前馬步三司輪差借觀察承宣之官環衛四廂之職以伴蕃使射于玉津御園勝則有金帶陞轉官資之賞

私覲

俗謂之打傳益三節又從各以物貨互相易也

會食

上庠有會食之祀諸百司亦有之凡令官輪日為之惟陪蔬果盃釘之費

上馬

百司出局人從先報上馬者蓋舊禮只是乘騎自中興以來始乘肩輿也今從駕六乘騎爾

題名

進士及第各集鄉人于佛寺作題名鄉會此起于唐之慈恩寺塔也若官司州縣廳事各立題名碑者蓋備遺忘爾

春宴

中興以來承平日久慶元間京尹趙師罕奏請從故

事排辦春宴即唐曲江之遺意也即于行都西湖用船妓第自寒食前排日宴會先宴使相兩府親王次即南班郡王嗣秀嗣濮王楊開府兩李太尉次請六部尚書侍郎總兵官次宴節度承宣觀察使南班及都承知閣御帶環衛官次都司密屬官次卿監宴六曹郎中郎官益是京尹館伴京尹李澄遵故事奏請如前庶辦開禧以來兵興及追擾百邑行館官及于民此宴不復舉矣

朝野類要卷之一

朝野類要卷之二

稱謂

行在

天子駐蹕所在也古不聞之自秦漢方有此稱本朝  
百司初稱隨駕某司自真廟後皆稱行在唯三省學  
士院臺諫內侍省之類不云行在蓋天子之司及常  
侍之謂也

襍壓

以官職溫序進遷之列以定品秩高下序其列位

五府

兩叅政三樞密

兩府

樞密并真太尉

八位

此皆舊制左右僕射尚書左右丞中書侍郎門下侍郎之類

三省

中書省門下省尚書省也中書擬定門下進畫尚書

院 奉行紹興十五年中書門下并而為一俱謂之制勅

兩省

給舍并左右史也東省繳章西省掌詞卧記注

兩制

翰林院學士官謂之內制掌王言大制誥詔令赦文之類中書舍人謂之外制亦掌王言凡誥辭之類

史官

起居郎起居舍人謂之左右史掌記注日生機政又

實錄院日曆所會要所皆編修國朝史又

侍從

翰林學士給事中六尚書八侍郎是也又中書舍人左右史以次謂之小侍從又在外帶諸學士待制者

六院

登聞檢院登聞鼓院官告院都進奏院諸軍司糧料院兩審計司皆儲林擢用之地凡作縣有聲等官多除此

四轄

提轄左藏庫又思院權貨物雜買場謂之四轄亦為儲財之地

貼職

宰執資格者帶觀文資政端明學士侍從資格者帶諸閣學士及以次侍從帶待制卿監資格者帶修撰直閣及京官直秘閣武臣帶閣門宣贊舍人之類

機政

宰執職事之謂

朝典

國之大法

親民

理治百姓鎮撫知寨亦然

長貳

正官與副官之總名

幕職

僉判司理司法戶錄參部推察推節判察判之類幕者本以主師出塞從權安營立帳而得此名如衛青幕府是也

上官馬

教授至廳前上下馬故也

寄居官

又名私居官不以客居及本貫土著皆謂之私居寄居其義益有官者本朝廷仕官也

判府

宰相三公三少真王出鎮方謂之判其餘皆過呼

縣令

未改京朝官宰縣也

知丞

已改京朝官也未改則帶權字只謂之縣丞

軍使

在縣之上軍監之下

舉主

依條制科格以薦名于朝廷者內有職司常員之分

元老

國之耆舊名臣也

宿儒

久有名望之士也

賢格

清要儲材陞擢之所也

言路

臺諫給舍也

縉紳

仕宦之稱本指其帶帶之類也

儲材

拔擢于此職以待進用也

清要

職慢位顯謂之清職繁位顯謂之要兼此二者謂之清要。

冷官

凡緩慢優閑之職是也。因杜子美詩云：廣文先生官獨冷，後人遂傳以稱教官。

麤官

武臣之軍官自謙或以為譏。

開口官

舊制：第人帶左字，餘皆帶右字，以左字像開口也。今並不帶左右字。

院體

唐以來翰林院諸色皆有後遂效之，即學宮樣之謂也。如京師有書藝局、醫官局、天文局、御書院之類是也。即今畫家稱十三科亦是京師翰林子局如德壽宮、置省智堂，故有李從訓之徒。

世賞

書曰：賞延于世，即今之秦蔭之類。



選調

承直即以下迪功即以上文資也又謂之選海以其難出常調也

未出官

謂之學助教將仕通仕登仕下班之法之類

十三階

右武以上至刺史爲止

舉業

治經

春秋兼三傳易詩書二禮各以一經仍各兼語孟謂之經若詩賦人舊六曾兼一經今免

武舉

分二等蓋絕倫者挽二石以上力或平等者挽九斗以上可也至日步射兩箭馬箭正背共五箭爲頭場

三場

第一場本經義三道小經義各一道計五道若詩賦人八韻賦一道省題詩一首第二場論一道第三場策三道仍各有格式條限若武舉則以弓爲第一場

其七書義五道其策三道

### 州縣學

即古者國有庠鄉有校之義本朝宰相王安石增制應補之法考試陞賞與貢舉不相干慶元以來又增闕齋名以廣武舉之士蓋從臣僚請也

### 簾試

補試中者再于長官簾前試一次治經人作語孟義詞賦人作省題詩優者行食其有任于銓試過赴吏部簾試經義破題或有詩亦謂之簾試

### 供課

州縣學生分旬習試三場各給冊子供呈上庠亦然

### 堂試

州縣考試分將來由除此陞補

### 陞補

州縣學春秋兩放補試白身人本經中者注籍

### 混補

天下士人不限有無學籍皆得赴試本經一場中者入上庠

大補

選試舊舉待補及州縣學等給該恩士人陞上庠也

待補

三場內只第一場合格式及補試內只大經合格蓋恐黜下之可惜故以此勉其學者唯武舉只弓馬合式者待補謂之一事中

私試

每月試一場凡滿計三場謂孟月本經仲月論季月策並鎖試于前廟以學官主文考校唯公試之月免

公試

每歲春二三月之交公試兩日三場謂第二日論策各一道並差外官于貢院主文以學官干預考校

內舍

入上庠宗學者皆外舍生若校定滿年行食分數之人如公試中等即依陞內舍與公試榜全出自後方得為長論若內舍私試連三次不中者降為外舍

量試

州縣學略而小試其才也

請舉

赴解試之謂也古者舉賔之制

保頭

舉人三舉終場者得爲解試保頭

解試

依額取人薦名于朝廷謂之鄉貢若從來無學籍者  
徑營請舉則必費力如曾赴混補則猶庶幾于科舉  
也此係本州及第出身官主文考校其武舉只就殿  
步帥前試弓馬中者然後赴鎖院者試七書并策蓋

武舉者保官徑奏名引試也

漕試

轉運司承集本路見任官牒送到隨侍子弟及服內  
親如州府解試法但漕司員額頗寬容也係選差本  
路官主文考校

附試

同事在他鄉而未能歸本貫者皆就轉運司附試只  
是取人太少却易爲文才

充解

在學及試或遇特恩

比試

武舉才人先試經義一次然後赴解試

省試

除四川外諸州及漕司解士統禮部貢院試鎖名曰  
省試

免省

上舍試取中在省試前即免省赴殿

還省

前舉已中解試目丁憂事故之人于本舉還試

類試

四川州軍解士只就安撫制置司類省試徑赴殿試  
殿試

本朝例就崇政殿鎖試考策畢日唱名

還殿

前與已中省試人因事故未赴殿者今舉還試

免殿試

往年遇主上即位以後第一次謂之龍飛榜又嘗曰

諒陰皆曾免試祇詣唱名

唱名

謂之傳臚聖上御殿宣唱第一人第二人三人爲一班其餘逐甲爲一班

恩科

年高而到省多次特奏名其魁亦賜同出身而甲次則得文學之名俟赦文內于銓試或于銓注即授權尉之類亦有雖年及而未願就恩科亦從便乃赴舊省

三元

解試省試並爲魁者謂之雙元若又爲殿魁者謂之三元然多是免殿故也蓋殿試以策取人難得必魁治經義人也

黃甲

正奏名五甲也吏部謂之黃甲闕榜第五甲舊多貴顯故呼爲相甲

探花

選年最少者二人于賜聞喜宴日先到瓊林苑折花

迎狀元吟詩此唐制久廢今人或記第三名為探花者非也

### 擔榜

戲謂第五甲末名爲擔榜狀元

### 宏詞

自唐以來有之本朝之制尤嚴紹興間令背記九經注疏而學者遂少後臣寮請免之止令記其義鎖院之日三詩六論如五題合格即中選

### 銓試

奏蔭出身人各占經題赴春鎖試中選即參部若是登仕即以下即換選人父資也黃甲年分則第五甲人就赴試之

### 拍試

武臣奏補人銓試弓馬者謂之拍試并批試律文

### 刑法試

奏補人願試刑法者兼治兩小徑如中選即入大理評事或提刑司檢法官次第可至刑部尚書

### 教官試

及第出身次甲人合試教官者依次試本經詩賦中  
選即注諸州教授

### 名試

及第出身次甲人已歷仕者名試館職中選即為秘  
省官若武舉人名試閣職則為舍人所試文字尤精  
細于常制

### 試換

武臣願換文資者如銓試之制若奏蔭人并武舉及  
第官願再試出身者從便應解試赴省唯年勞補授

及祿出身人不許換也

### 醫卜

### 醫學

如太武學設齋仍如舉人入試程文于制局下又教  
授

### 判局

判太史司即挈壺靈臺即五官正及大夫遞遷元判  
局判太醫局自齋舍職事遞遷判局

### 國醫



此名醫中選差元診御脉內宿祇應此是翰林金紫  
醫

試補

星學則于本局試算造大曆測驗乾象醫學則赴禮  
部貢院三場選試于難經素問脉經本草仲景傷寒  
論聖惠方病源此經內出題第一場則墨義三道脉  
義二道第二場大義三道假令論方義一道第三場  
假令法二道運氣一道比之士人止不赴殿試其舉  
業亦為科場

局生醫生

如前試補中則曰局生學生入學次第補試遷改職  
事如庠序例

出官

醫學出官則補醫職注授京寺監脩合官辦驗官及  
諸州軍駐泊醫官

朝野類要卷之三

入仕

及第

文武舉必特奏皆為及第出身

奏補

文武臣入仕及格即依本身官照格法過大禮奏蔭  
弟姪子孫若侍從以上許降資授異姓如官雖及而  
芳不及則身後息澤

捧香

文昌趙昇集錄

后妃親屬誥恩得官者謂之捧香例

西官

親王南班之壻號曰西官即所謂郡馬也俗謂駁帶頭官

軍班

內外諸軍兵并班直軍頭司等人年勞或有功得官皆是

年勞

內外百司吏職及諸州監司吏人皆有年勞補官法

俗謂出職是也免注試徑注差遣

襍出身

非及第奏補年勞之類者謂之襍出身

保引

內外百司差遣皆以恩例保引親屬係籍待試或起補非比州縣泛常差補也

進納

有司納粟賑糶及助邊者有只納粟則得不理選限又資者俗謂之買官此不可以就試出身也

封贈

生日封死曰贈自有格法典例外有年及百歲即應加封一階而致仕也

歸附等

歸正謂元係本朝州軍人曰陷蕃後來歸本朝歸順謂元係西南蕃蠻溪洞口首等納土歸順依舊在谿洞主管職事歸明謂元係西南蕃蠻峒人納土出來本朝補官謂給田養濟歸朝謂元係燕山府路州軍人歸本朝者忠義人謂元係諸軍人見在本朝界內

或在蕃地心懷忠義一時立功者

脚色

初入仕必具鄉貫戶頭三代名銜家口年齒出身履歷若注授轉官則又加舉主有無過犯崇寧間即云不係元祐黨籍紹興間即云不係蔡京童貫未勦王黼等親屬召保官結罪慶元間又加即不是偽學近漸次除去

中旨

自禁中降下御筆或直旨付有司施行

參堂

京朝官不于部授即于廟堂陶鑄差遣謂之參堂又曰干掌亦曰堂闕或差遣人者

呼名

欲見宰執者具名刺門狀計會本府書司直省官之下呼名候呼名即隨引參見

堂除

都堂奏差者武臣即樞密院事專差員闕則曰樞密院劄子或樞密院奏云云

參選

吏部四選尚書左選掌承務郎以上右選掌武翼郎以上侍郎左選掌迪功郎以上右選掌承信郎校尉以上兵部掌下班祗應進義勇副尉等刑部掌進武副尉所謂參部注授也

擬差

四選兵部奏議差遣

殘闕

年老免銓試人或襍出身等人即注殘零員闕差遣

辟差

帥撫監司郡守或奉使選堪倚用之人具名詣闕奏差

空差

四川州縣只就各路轉運司爲銓選參注差遣每孟月出榜仲月參注季月申發請朝廷給降付身文字內亦有通判員闕者若因事到闕亦許歸吏部或參堂陶鑄者其二廣六間有之

左攝

帥撫監司州郡選有官或待闕人攝職謂之權局本官自謂之被擢是也若白身人借攝文學助教將仕郎副尉承信之類謂之白帖有法有禁旌擢

謂賞有功績者特差職也

起復

已解官持服而朝廷特再推用者名起復繫此二字或已年及致仕或在降責中朝廷再推用之謂也

改官

承直郎以下選人任項俟得本路帥撫監司郡守  
舉主保奏堪與改官狀五紙即趨赴春班改官謝恩  
則換承務郎以上序謂之京官方有顯達具舉主各  
有格法限員故求改官奏狀是爲艱得如得則稱門  
生

### 減年

唐看轉官有四考或五考者該恩減其年數則給公  
據異日奏數收使

### 寄理

當轉而官序之名犯家諱者權止且帶寄理二字他  
年併轉

### 雙轉

有軍功人自武翼郎以上每轉一官即雙轉兩官及  
第出身人不轉奉直中散亦乃雙轉也

### 特轉

謂非尋常法陞轉而有指揮賞轉者

### 超轉

有功或及第人特越次第徑轉之例

止法

謂如文臣轉中大夫直候職及侍從格方許輔大中大夫若執政轉至金紫光祿大夫直候拜相方許轉行特進又如武臣轉行武功大夫若有軍功方許轉行右武餘人以三官比轉一官又如捧香只轉一詞武郎年勞只轉至承直郎之類

回授

合轉官而碍正法者許回授與弟姪子孫入仕或轉比換

內外百司更職未及年勞而願比換者依格改換官資注擬差遣

兩易

俗謂對移也或避嫌或以得罪被劾而罰輕者皆兩易其任或事妨亦然

賜出身

元非科舉入仕而特蒙大用或賜同進士出身方可執政蓋國法也

食邑



官序及格合封諸縣開國男以上者隨有食邑戶數  
蓋比古之大小諸侯得國也若有及格則有食實封  
凡百戶舊制每實封一戶隨月俸給二十五文其加  
封則自格法

### 職田

外任大小官屬合得職田者月俸之外本州給還米  
斛凡到任一年分並四月以前理上該給

### 茶湯錢

為兼而給也

### 賜借緋紫

本朝之制文臣自入仕著綠滿二十年換賜緋及魚  
袋至滿二十年換賜紫金魚袋又有雖未及年而推  
恩特賜者又有未及而所仕職不宜緋綠而借紫借  
緋者即無魚袋也若三公三少則玉帶金魚矣惟東  
宮魚以玉為之

### 技術官服也

醫官并太史官謂之文官頭武官尾蓋初入仕著綠  
及格則換紫并紅鞵帶又及和安春官大夫則或特

轉之類而醫官又有特賜金帶者

兩鎮

謂封兩處節度使

兩國

謂封兩國王及夫人

襲封

謂世代授此官也如兩嗣王主奉濮秀祭祀如孔子  
之後世封衍聖公如周世宗之後柴氏世封崇義公  
蓋二王後之故事也

異恩

如詔書及贊拜皆不名如肩輿入廟並賜元老大臣

職任

百司

上自三省下及倉場庫務皆為百司或謂之有司又  
謂之京局

內諸司

自內侍省以下在京禁中置局并應屬內司子局者  
皆是也

左右廂

廂官之名取廊廡間分職佐治之義今之城南北廂北通州判資序蓋比假開封府左右四廂舊制也蓋在城兵馬都監則又廊廡管押之義也故無刑禁

外臺

安撫轉運提刑提舉實分御史之權亦依漢繡衣之義而代天子巡狩也故曰外臺

駐劄

松江都統諸路總管路鈐等及京畿東南將之類皆

曰集州駐劄者蓋本朝兵制所以示此乃天下之軍也

牌印

印司掌銅木朱記以牌詣本官請閱印用單封匣復納之凡牌入則印出印入則牌出蓋立法嚴防之意也

公參

小官赴任其長貳公參訖衙前聽候三日方敢退歸本職今制遂禁送拜

成資

滿任也

舉留

見任官有政績而吏民願得再任者須本處進士同  
者若以下列狀徑歷司舉留次詣上司申乞

不釐務

添差之官則不理政事也若許干預則曰仍釐務

朝野類要卷之三

朝野類要卷之四

法令

一司

在京內外百司及在外諸司帥換監司射賦兵馬去處皆有一司條法如安撫司法許便宜施行之類是也

海行

勅令格式謂之海行蓋天下海行之義也

續降



法所不載各異同而謂利便者自修法之後每有續  
降指揮則刑部編錄成冊春秋二仲頒降內外遵守  
一面行用若果可行則將來修法日增文改創也  
進擬

刑部定法斷獄奏成也

番復

大理寺定刑下所屬州郡斷獄也

勅杖

謂降旨而杖之也

置直

內外百司吏屬有公罪之輕者皆罰直入官每一日  
即二百文足如贖銅之例

文書

詔書

翰林學士院四六句文行而為典故大事者也

手詔

或非常典或是篤意及不用四六句者也

制書

但是聖旨文字皆為制書

御札

又嚴于詔書

德音

泛降而寬恤也

曲赦

特降此赦頗輕乃專為一事一處有兵災罪者之類

赦書

常制恕刑之命

翻黃

監司州縣備錄赦文而行下所部也自慶元末諸縣亦降黃赦蓋從臣寮請

批答

執政以上有章奏請則降批答以下則降詔

宣帖

惟寧校授宣理為息例陞補

白麻

文武百官聽宣讀者乃黃麻紙所書制可也若自內

降而不宣者白麻紙也。故曰白麻。唐元和初，兄赦書德晉王后建儲，大誅討，拜免三公宰相，命將曰制書，並用白麻，不用印。

詔報

學士院闕朝報省之稱

書黃

凡事合經，給事中書讀，并中書舍人書行者，書畢即備錄上黃。過尚書省，給劄施行。如不可行，即不書而執奏，謂之繳駁。故俗諺曰：不到中書，不是官。

省劄

自尚書省施行，事以由拳山所造紙書，押給降下百司監司州軍去處。

部符

六部行符，即省劄之義。其未必曰符到奉行。

勅牌

凡知縣以下并進士改第出身，并被旨揮差，元試官或奉使接送館伴及僧道，被旨任持并廟額，并給勅牌。



官牒子

上司尋常追呼下司吏屬只以片紙書所呼叫目依  
差走吏勾集

奏劄

又謂之殿劄蓋上殿奏對所入文字也凡知州上見  
辭皆用此

旦表

在外帥守監司每月一日上起居表所以代朝奏也  
各預先發上都進奏院臨期徑闕門投進

謝表

帥守監司初到任并陞除或有宣試皆上四六句謝  
表

賀表

帥守監司遇有典禮及祥瑞皆上四六句賀表唯冬  
至歲節不用四六句自有定式

起居表

嚮來在恤制內遇冬至故改之名為起居其他合用  
賀表亦如之

慰表

嚮來恤制皆上表稱慰

百官表

百官詣殿拜表皆宰相為班首繫銜總之云文武百  
寮次云丞相臣某等係禮部即官行詞

奏牋

若上后妃東宮則名之曰牋

功德疏

聖節則帥守監司各上賀表并道釋功德疏及進館

皆四六句經通進司投進

萬言書

上進天子之書也若上公使則名之曰長書

進狀

經檢院者圖實封機密軍期事朝政闕失利害及公  
私利濟并軍國重事若經院者疊角實封陳乞奏荐  
再任已得指揮息澤除落過名論訴抑屈事本處不  
公及沉匿等事在京官員不法等事兩院封狀皆長  
八寸

堂劄

上宰執之公劄也

白劄子

上利便之書也與不題名之義同

邊報

沿邊州郡列日具幹事人探報平安事宜實封申尚

書省樞密院

奏案

州郡或提刑司勘成大辟及合奏獄案也得回降則

斷之

帥劄

平時西州安撫制置司亦書給劄子蓋其重權兼主  
銓量差注類試事也其他安撫制置司便宜者亦書  
給劄子

朝報

日生事宜也每日門下後省編空請給事判報方行  
下都進奏院報行天下其有所謂內探者探衙探之  
類皆裏私小報率有泄漏之禁故隱而號之曰新聞

政事

巡按

監司按四季巡視所部州縣者古曰漢高帝游雲夢之後漸廢巡將述職之制故遣奉使以代之

銓量

審驗人才也若四川新任守存去朝廷遠者免朝拜只赴按撫制置司銓量乞之任

使民五事

監司郡守到任半年各具便民五事奏上

臧否

監司歲其所部官美惡奏上謂之臧否奏若某員功過俱無者不具

雜制

禁謁

百司門首謁禁者不許接客也若大理寺官則又加禁謁及六不許出謁也

式假

除父母喪解官及承祖父母重服之外餘親之喪只

假式假

白堂

公事取覆御史也

過堂

尚書省樞密院屬官于入局日分持所議事上都堂  
凜白掌執而施行之

家諱

授職任而犯三代名諱者許避之如開禧初張嗣右  
除起居即以犯諱辭免曾改名修注官其餘若一名

偏犯即不避亦具辭免之

本朝請

在京官觀仍奉朝請者依舊趨赴上參也

堂謝

授官職朝謝畢謝掌執

待罪

具奏自劾也又執奏陳自謙之意臣待罪政府或帥  
府獲逆寇恐難于上請先誅而後申奏待罪乃待其  
朝廷責其專擅之罪諸州軍被火亦然

違年

過期不赴任也理為犯批上印紙

帥幕

安撫

安撫之權可以便宜行事如俗口口口行後奏之類  
是也通轄一路之兵民若宰執出鎮或曰安撫大使  
若沿邊又有管內安撫謂只轄本州也

報捷

奏勝之書也詩云一月三捷

露布

誅討奏勝之書也

蠟丸

以帛寫棧密也外用蠟固陷于肢肱皮膚之間所以  
防在路之浮沉漏泄也

挑戰

兩陣既立各以將出鬪也

鏖戰

乘勇而進也故漢注以為盡死殺人曰鏖

卷戰

城市之內接戰也如李存孝誤入長安之類

野戰

閱習馳銳也

劫寨

夜間攻其營壘令其自亂然後動兵潰之

貫寨

日間攻亂其營壘也

宣府都督

侍從以上稱宣府即平時安撫之義也執政以上則稱都督

節制

本朝兵制最為周密如節制之稱所以使寄戍之軍服其權也若平時鎮江府武彞軍駐楚州守臣有統轄屯戍之兼職

招討招撫

討者伐不道之臣撫者安故國之民

便宜

諸將之從權行事也。謂之便宜點涉。

密詔

自唐已有此益事于大紀不款明示則密遣圖之

矯詔

一時從權以濟其謀也

檄書

彰彼之罪惡所以出師之由以感動人心期与天下  
關

朝野類要卷之四



朝野類要卷之五

降免

、遭章

臺諫入奏疏言其罪以請貶其人也

彈奏

言其公罪及閣門御史臺糾其失儀等事

合臺

自長官以下各入奏以言人罪也

按劾

謂按其事而申上或免其職

責授

責者不限降幾官之數徑指低階責授之

聽勅

在朝大臣或被臺章或先乞出則一面般出國門于  
時觀中安泊以待命

南行

仕宦得罪而南行者蓋二廣多是瘴烟遠惡及水土  
惡逆之州縣江西亦或有之所以貶于其處也

剝麻

本朝無誅大臣之典故大臣有罪亦多是先與官觀  
然後臺諫上章得旨批依別日又宣麻降之漸次行  
貶

居住

被責者凡云送某州居住則輕于安置也

安置

回奏請得祠祿者將來可以復任職肩若朝命與之  
則不任也故優勳又有理作自自陳乏名也

岳廟

選人使臣則監岳廟及宮觀之次等也

引年致仕

古之大夫七十而致仕之例也古則皆還其官爵于君今則不然故謂之守本官致仕惟不任職也若雖朱及七十但昏老不勝其任亦奏請之故曰引年

憂難

致仕

官員不祿先乞守本官致仕續奏身故者緣致仕合

有蔭補恩澤也

遺表

太中大夫以正不祿者既奏致仕後上遺表則有遺表恩例

草土臣

丁憂者既發喪居廬如其銜則稱草土臣

駕幸臨奠

本朝禮例每大臣薨皆駕幸其府第臨奠之恩多是其子孫上表辭免之

勅葬

差中貴官監護喪事

宣塋

賜資財令辦葬事喪家願宣葬蓋省費如勅葬也

丁憂

以母憂解官持服承重者六同軍官免之若餘親則有給事假法

謚法

自古有之所以定生前之德行每一字其義取用之

端甚多本朝立法有雖無官而有德行者亦賜之皆有擬文一道太常博士撰吏部考功奏行之

從吉

大祥畢禫服終踰月從吉謂改吉服也然後朝見或參選

餘祀

書鋪

凡舉子未試并仕宦到部參堂應該節次文書並有書鋪承幹如舉子乏錢者自請舉至及第一并酌勞

書鋪者

承受

仕官在外任者自有專一承受幹當之人或是百司  
係籍人或門吏凡有大小事務為之了辦

陶鑄

宰相推用仕宦謂之陶鑄者取造化之義而曰留相  
家諱鑄遂易為陶鑄正如避寇相名祇書此准字也

宅引

宰執入堂前有朱衣乘騎對引若無常朝之日則入

府第入堂治事謂之宅引入堂

告詞

有四六句者有直文者並書于告軸然侍從以上須  
是四六句行辭凡在內但是朝班百司雖迪功郎亦  
有之若外任須是京官通判以上則命詞之若節度  
使以上則文先次宣降麻制矣

網袋

侍從以上資格者官誥皆有紫絲銀鐸鈴銅袋貯之

望祀

如五岳四瀆之類則每歲皆降御名祝版祀之若其餘去處皆望祀

### 車馬

官人出入其兵士呵喝車馬者蓋舊來只是乘坐車子也中興以來用肩輿以喝車馬

### 揀班

班直等皆是三衛舊司指揮人兵及皇城司親事官揀中等之人充之如捧日揀過東三班天武揀過御

龍直驍騎揀過騎御馬之類然本朝之制班直不置隊伍若教習武藝臨期整齊旗號此最良法也

### 京畿將

京畿舊有十將今第二將駐劄臨安府緣日差出招投敵賊因而此也

### 破日合尖

選人得初舉狀謂之破日末後一紙奏足謂之合尖如造塔上頂之意

### 勘過

在京關支請給等項徑糧斛審院計司勘過及關會

太府等方可支給其外路大軍錢糧自有分差糧審院施行

打視

唐務差使人不投軍人須遠視目力喝其指教謂之打視防其目疾耳

輪筆

謂官員外以波學書押成以日或以長二分而判押之

集注

左右選注關集長貳廷坐而下列願注授之人高唱其闕而問之以取窠闕

期集

應舉士人欲共陳其利便則指定一所在會集諸人定議以申明之行都差注諸大寺院頌首亦集諸頭首相聚定議此又行檢保申明差亦謂之期集

同年鄉會

諸處士大夫鄉曲并同路者共在朝及在三學相聚作會曰鄉會若同榜及第聚會則曰同年會

朝野類要卷之五

國家圖書館, NATIONAL CENTRAL LIBRARY, TAIWAN, R.O.C

丁氏持靜齋藏書  
宣統三年  
李欽滬上購入

